

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
KANTONALNO TUŽILAŠTVO-TUŽITELJSTVO
ZENIČKO-DOBOJSKOG KANTONA
Broj: T04 0 KTPO 0042657 20
Zenica, 03.10.2022. godine

KANTONALNI SUD U ZENICI
-Sudiji za prethodno saslušanje-
ZENICA

Na osnovu člana 45. stav 2. tačka i) u vezi sa članom 241. stav 1. Zakona o krivičnom postupku F BiH, p o d i ž e m

O P T U Ž N I C U

Protiv:

- 1. ALAJMOVIĆ ZEHRE, 1987. godište, iz Breze, , neosuđivana,**
- 2. ALAJMOVIĆ MUSTAFE, 1984. godište, iz Breze, , neosuđivan,**

Što su:

I Alajmović Zehra i Alajmović Mustafa, zajedno

U vremenskom periodu od 01.01.2015. godine do 14.12.2021. godine u Brezi, zajednički i dogovorno, kao fizička lica i supružnici, s ciljem da sebi pribave protivpravnu imovinsku korist, doveli lažnim prikazivanjem činjenica veliki broj fizičkih i pravnih lica u zabludu i držali ih u zabludi, da na štetu svoje imovine uplate određena novčana sredstva na njihove devizne i transakcijske račune, kao i na njihove PAYPAL račune, tako što su putem društvenih mreža i svojih Facebook aplikacija na njihovo ime, te Facebook profila „Ko nema neka uzme, halal je“ i ostalih elektronskih medija pozivali veliki broj fizičkih i pravnih lica da vrše pojedinačne novčane uplate na ime humanitarne pomoći i donacija prvenstveno za liječenje Alajmović Zehre, te stipendija, zekata, kuršana i dr., a da bi u stvarnosti prikupljana novčana sredstva trošili u druge svrhe tako što su veće količine potrošili za privatne svrhe podizanjem novca na bankomatima, kartičnim plaćanjem u raznim marketima široke potrošnje na području BiH, zatim specijaliziranim prodavnicama tehničke robe, obuće, odjeće, benzinskim pumpama, naknade za online video igrice, popravak svog vozila, kao i druge utroške, umjesto za liječenje Alajmović Zehre za koju su prvenstveno tražili novčanu pomoć, na koji način su skrivali ove činjenice od ljudi od kojih su tražili humanitarnu pomoć i od javnosti i time ih doveli i držali u zabludi o stvarnoj svrsi utroška novčanih sredstava, da bi se svjesno i sa htjenjem udružili, da takav novac za koji su znali da je pribavljen učinjenjem krivičnog djela prijevare iz člana 294. stav 2. u vezi sa stavom 1. KZ F BiH, a koje su počinili na naprijed opisani način, direktno primaju, drže, vrše konverziju istog i raspolazu njime, što su i činili, a čega su bili svjesni i što su i htjeli, na način da su isti novac primali na otvorene transakcijske i devizne račune korisnika Zehre Alajmović, otvorene kodbank d.d. BiH, bank d.d. i bank d.d., zatim na otvoreni transakcijski račun korisnika Mustafe Alajmović, otvoren kod bank d.d. BiH, a koja novčana sredstva su doznačena na iste od strane fizičkih i pravnih lica, najčešće putem njihovih PAYPAL računa, u najvećem dijelu s namjenom za liječenje Zehre Alajmović, u pojedinim slučajevima i za pomoć drugim licima,

za razne druge humanitarne svrhe ili samo za pomoć-nespecificirano, da bi Alajmović Mustafa nakon što mu je blokiran transakcijski račun, dogovorio sa B. M. i njegovom suprugom B. S. da njemu i njegovoj supruzi Alajmović Zehri daju svoje bankovne kartice i PIN brojeve od njihovih transakcijskih računa otvorenih, i to: u banci d.d. Sarajevo na ime korisnika B. M. i u banci dd Sarajevo na ime korisnika B. S., a sve kako bi iste transakcijske račune povezali sa svojim PAYPAL računima na koji su vršene uplate pojedinačnih novčanih sredstava od strane fizičkih i pravnih lica kako je to naprijed i opisano, a obrazlažući B. M. i B. S. da su im njihove bankovne kartice potrebne kako bi novac koji im je neophodan na liječenje Alajmović Zehre, sa navedenih PAYPAL računa nakon izvršene uplate bio transferiran na njihove transakcijske račune i u svrhu konačnog podizanja novca, a koji novac će koristiti isključivo za navedeno liječenje Alajmović Zehre, pa su B. M. i B.S. vjerujući da će Alajmović Mustafa i Zehra iskoristiti novac isključivo za tu namjenu i dali svoje bankovne kartice sa PIN-om,

pa su na opisani način ostvarili priliv novčanih sredstava i to: Alajmović Zehra u periodu od 01.01.2015. godine do 21.07.2021. godine na svoje devizne i transakcijske račune koji se vode kod poslovnih banaka i to: kod bank d.d. Mostar u iznosu od **389.740,74 KM**, kod bank dd. Sarajevo u iznosu od ukupno **243.106,14 KM**, a koji iznos je bio prvobitno uplaćen u pojedinačnim iznosima na njen PAYPAL račun i PAYPAL račun A. M., i kod d.d. Sarajevo u iznosu od ukupno **108.527,67 KM**, što ukupno **iznosi 741.374,55 KM** koja novčana sredstava je potom Alajmović Zehra sukcesivno podizala na način da je direktno uzimala gotovinu na šalteru banaka ili direktno putem bankomata ili plaćala kartično razne usluge ili robe, a koji novac su zajednički trošili u naprijed navedene svrhe, te druge utroške koji nemaju određenu povezanost sa prikupljenom humanitarnom pomoći, odnosno sa liječenjem Alajmović Zehre, kao i sa kupovinom nužnih stvari koje su im potrebne kao i njihovoj porodici, dok je istovremeno Alajmović Mustafa obzirom da je imao punomoć svoje supruge Alajmović Zehre za podizanje novca sa njenog transakcijskog računa u banci dd Mostar podizao takođe sa tog računa direktno putem bankomata ili podizao gotovinu na šalteru banke,

pa su Alajmović Mustafa i Alajmović Zehra na opisani način podigli i prisvojili uplaćena novčana sredstava u ukupnom iznosu od **740.390,12 KM**, te Alajmović Mustafa je u periodu od 08.07.2015. godine do 14.12.2021. godine ostvario priliv novčanih sredstava u ukupnom iznosu **10.860,97 KM** na njegovom transakcijskom računu koji se vodi kod bank dd Mostar, od kojeg iznosa je podigao i prisvojio novčana sredstva u ukupnom iznosu od **10.325,37 KM**, da bi Alajmović Mustafa ostvario priliv novčanih sredstava putem svog PAYPAL računa povezanog sa transakcijskim računom **B. M.** na prethodno opisani način u periodu 26.05.2018. godine do 31.12.2018. godine u ukupnom iznosu od **67.427,48 KM** i u periodu od 01.01.2019. godine do 20.07.2019. godine u ukupnom iznosu od **73.591,08 KM** što ukupno iznosi **141.018,56 KM**, koja novčana sredstva je sukcesivno sam podizao i prisvajao direktno putem bankomata ili na blagajni ili je na njegovo traženje navedena novčana sredstva podizao B. M. sa svog računa ili putem bankomata i iste predavao lično na ruke Alajmović Mustafi, pa je tako Alajmović Mustafa podigao i prisvojio sa računa B.M. ukupan novčani iznos od **141.018,56 KM**,

dok je Alajmović Zehra putem svog PAYPAL računa povezanog sa transakcijskim računom **B. S.** na prethodno opisani način, ostvarila priliv novca u periodu 02.06.2020. godine do 09.12.2020. godine u ukupnom iznosu od **59.308,52 KM**, koja novčana sredstva su sukcesivno podizali i prisvajali Zehra i Mustafa direktno putem bankomata ili na blagajni ili je na njihovo traženje navedena novčana sredstva podizala B.S. sa svog računa ili putem bankomata i iste predavala lično na ruke Alajmović Mustafi, pa su tako Alajmović Mustafa i Zehra podigli i prisvojili sa računa B. S. ukupan novčani iznos od **56.549,86 KM**, na koji način su koristeći transakcijske račune korisnika **B.M. i B.S.**, podigli i prisvojili ovih novčanih sredstava u ukupnom iznosu od **197.568,42 KM**,

pa su naprijed opisanim radnjama, dovodeći u zabludu i održavajući u zabludi **više od 3.700 uplatilaca** pravnih i fizičkih lica među kojima i: P. H., H. M., M. A., E. P., N.A., A. K., A. M., S. H., E. L., A. M., E. B., A. Š., E.H., E. S., A. B., S. K., B.L., S.L., A. H., Dž. F., V. P., M. O., H. E., Š. E., E. K., S.S., K.K, H. M., N. E., H. B., N. D., S. T., M. M., Dž. L., M. S, J. M., S. S., E. M., N.H., L. I., S.P., C.-M. E., E. M., H.B., S. S., A. K., N.I., A. J.-I., M. S. A., A. I., S.A Č. E. V., N. M., D. S., S. L., J. Z., F.T., T. P., S. V., J. H., A. Z., Đ. M., A. M., J. A., D. C., A. K., A. F., Č. B., L. P., J. Č., S. H., A. K., A. Dž., J. K., I. K., A. Ž., N. B., A. K., M. M., A. S, Dž. M., S.K., I. S. i M. H., iste naveli, da na štetu svoje imovine uplate određena novčana sredstva na njihove devizne i transakcijske račune, kao i na njihove PAYPAL račune na ime humanitarne pomoći i donacija prvenstveno za liječenje Alajmović Zehre, koje uplate su ista lica i izvršila sa uvjerenjem da daju donacije za liječenje Alajmović Zehre, na koji način su **Alajmović Mustafa i Alajmović Zehra** ostvarili **ukupan** priliv novčanih sredstava u iznosu od **948.283,91 KM**, od kojeg su na liječenje Alajmović Zehre i to u inostranstvu u R Hrvatskoj, utrošili novčani iznos od **6.383,05 KM**, dok su ostatak novčanih sredstava prisvojili za sebe i utrošili za svoju korist i na opisani način, čega su bili svjesni što su i htjeli, pa su time pribavili za sebe protivpravnu imovinsku korist u ukupnom novčanom iznosu od **941.900,86 KM** (740.390,12 KM + 197.568,42 KM + 10.325,37 KM - 6.383,05 KM),

II Alajmović Zehra, sama

U vremenskom periodu od 01.01.2019. godine do 31.12.2020. godine u Brezi, u namjeri da izbjegne plaćanje dužnih poreznih obaveza, a s ciljem pribavljanja protivpravne imovinske koristi, svjesno nije obračunala, prijavila i uplatila porezne obaveze propisane Poreznim zakonodavstvom u Federaciji, koje se odnose na porez na dohodak, ne dajući zahtijevane podatke o svom oporezivom prihodu i uskratila plaćanje poreza na dohodak-porez po odbitku, a koje je bila dužna platiti na osnovu odredaba članova 2. stav 1), 5. stav 1, tačka 4.,6.,7., 36. stav 1. i 37. Zakona o porezu na dohodak FBiH (Sl. novine FBiH broj 10/08, 91/10, 44/11, 7/13 i 65/13), iz razloga jer prihode koje je u navedenom periodu ostvarila putem doznaka velikog broja pravnih i fizičkih lica na njene račune kod pomenutih banaka na način kako je to i opisano u tački I optužnice, i to u 2019. godini ostvarila ukupne prihode u novčanom iznosu od 210.669,40 KM, a u 2020. godini ostvarila ukupne prihode u novčanom iznosu od 333,451,78 KM, a koji novčani iznosi predstavljaju osnovicu za obračun poreza na dohodak za navedene godine iz razloga što navedena novčana sredstva nije iskoristila u skladu sa svrhom za koju su sredstva pristizala na njene račune, tj. za njeno liječenje kako su ona i njen suprug Alajmović Mustafa tražili apelom za pomoć opisano u tački I optužnice, već je najveći dio iskorišten za druge namjene, a za naprijed navedeni stečeni prihod, Alajmović Zehra u postupku inspeksijskog nadzora Porezne uprave F BiH izvršenog dana 03.09.2020. godine, nije predočila poreznim inspektorima vjerodostojne dokaze da je stečene prihode po ovom osnovu u navedenom vremenskom periodu utrošila za namjene kako je propisano članom 5. stav 1. tačka 4. Zakona o porezu na dohodak, čega je bila svjesna što je i htjela, pa je za sebe izbjegla plaćanje poreza na dohodak i to u periodu od 01.01.2019. godine do 31.12.2019. godine u ukupnom iznosu od 21.066,94 KM, a u periodu od 01.01.2020. godine do 31.12.2020. godine u ukupnom iznosu od 33.345,18 KM, što ukupno iznosi 54.412,12 KM, pa je na taj način neplaćanjem poreza na dohodak, pribavila za sebe protivpravnu imovinsku korist u visini obračunatog poreza na dohodak, koji je oporeziv u ukupnom iznosu od 54.412,12 KM, oštetivši time budžet općine Breza za navedeni iznos,

Dakle, Alajmović Zehra i Alajmović Mustafa, zajednički i dogovorno s ciljem da sebi pribave protivpravnu imovinsku korist dovodili pojedina fizička i pravna lica lažnim prikazivanjem činjenica u zabludu da na štetu svoje imovine što učine, a šteta prelazi 30.000,00 KM, te udruživanjem, novac za koji su znali da je pribavljen učinjenjem krivičnog

djela direktno primili, držali i raspolagali njime, a novac ili imovinska korist je velike vrijednosti, a Alajmović Zehra sama za sebe izbjegla plaćanje davanja propisanih poreznim zakonodavstvom u Federaciji ne dajući zahtjevane podatke koji su od uticaja za iznos takvih obaveza, a iznos obaveze čije se plaćanje izbjegava prelazi 10.000,00 KM,

čime su počinili krivična djela:

- **Alajmović Mustafa**, pod tačkom I optužnice, krivično djelo prijevare iz člana 294. stav 2. u vezi sa stavom 1. KZ FBiH i krivično djelo pranje novca iz člana 272. stav 4. u vezi sa stavom 1., 2. i 3. KZ FBiH u vezi sa članom 31. KZ F BiH, sve u sticaju u vezi sa članom 54. KZ F BiH,

- **Alajmović Zehra** pod tačkom I optužnice krivično djelo prijevare iz člana 294. stav 2. u vezi sa stavom 1. KZ FBiH i krivično djelo pranje novca iz člana 272. stav 4. u vezi sa stavom 1., 2. i 3. KZ FBiH u vezi sa članom 31. KZ F BiH, te pod tačkom II optužnice, produženo krivično djelo porezne utaje iz člana 273. stav 1. KZ F BiH, sve u sticaju u vezi sa članom 54. i 55. KZ F BiH.

- a) Predlažemo da sud vezano za tačku I optužnice, na osnovu člana 114. i 115. stav 1. KZ F BiH i člana 272. stav 6. KZ F BiH, a u vezi sa članom 413. i 414. ZKP F BiH, oduzme pribavljenu imovinsku korist od **Alajmović Zehre i Alajmović Mustafe** u ukupnom iznosu od **941.900,86 KM**.
- b) Predlažemo da Sud vezano za tačku 2. optužnice, obaveže **Alajmović Zehru**, da oštećenom Općini Breza namiri pričinjenu štetu u ukupnom iznosu od **54.412,12 KM**.

Takođe predlažemo da Sud obaveže **Alajmović Zehru i Alajmović Mustafu** na solidarno plaćanje troškova krivičnog postupka u ukupnom iznosu od 1.771,41 KM, a koji se sastoje od troškova vještačenja po vještaku ekonomske struke i kao i drugih troškova koje Sud odredi u zavisnosti od složenosti postupka.

Pravobranilac je pred tužiocem postavio imovinskopravni zahtjev prema osumnjičenoj Alajmović Zehri u pogledu krivičnog djela porezne utaje iz člana 273. stav 1. KZ F BiH u vezi sa članom 55. KZ F BiH, te izjavio da traži da Alajmović Zehra naknadi budžetu Općine Breza načinjenu štetu u ukupnom iznosu od 54.412,12 KM.